

# Il nov conrectur da la scola tecnica vegn da Lantsch

Carriera a la scola auta a Rapperswil

DA CLAUDIA CADRUVI / ANR

■ Dapi l'emprim da settember è Alex Simeon conrectur a la Scola auta per tecnica a Rapperswil. Già da mattatsch ha el scuvert ses interess per maschinas. Ils ultims trent'onns ha el accompagnà differents svilups tecnics – ed ha fatg carriera. «Ils da Lantsch avevan adina dapli vacanzas che quels da Casti», sa regorda Simeon. Ils scholars gievan perquai la stad tar in pur u sin piazza da golf. Cun otg onns ha Alex cumenzà a lavurar tar ils purs, nua ch'el ha vesì mecanists che vegnivan a reparar maschinas e motors. Il mattatsch ha già baud savì tge ch'el fetschia pli tard. Segir mecanist! E betg forsà scolast sco ses bab!

## Ferrer e mecanist

Tar il Tribolet a Cuir ha il giuven Surmiran fatg l'emprendissadi sco «Schmied-Landmaschinenmechaniker». «Nus eran la davosa annada che ha anc emprendì da far lavurs da ferrer», raquinta Simeon. Sin in auter champ è el dentant stà in dals emprims, numnadament sco absolvent d'ina scola media professunala. La purschida era da lez temp anc betg enconuschenta. I haja duvrà in cumbat per dastgar far la scolaziun.

Cun ventg onns aveva Simeon la matura professunala en satg. «L'idea fiss stà dad ir a studegiar.» Ma ils studis han anc stuì spetgar dus onns, pertge Simeon ha già da far la recruta e suenter gudagnar las cordas da corporal e da litinent. «Durant il militar e pli tard sco student hai jau tranteren anc manà trais manaschis purils: ina giada per il president da Lantsch che era deputà, in autra giada per in pur che aveva mal il dies e lura per in pur che aveva rut la chomma.»



**Alex Simeon (51) enconuscha ina vasta paletta da spartas tecnicas. El ha fatg atras l'entir svilup sin il sector da l'informatica per inschegnars da maschinas.** FOTO C. CADRUVI

## Dissegnar sin il computer

Cun 22 onns ha el lura cumenzà il studi d'inschigner da maschinas a la Scol'auta a Rapperswil. Suenter il diplom ha Simeon visità ulteriurs curs a la ETH e fatg scolaziuns per CAD – il sistem da far dissegns tecnics sin il computer. Damai ch'i na deva da quel temp strusch anc informatichers è Simeon stà in dals emprims che ha pudì instruir roms sco CAD u informatica a las scolas professunalas da Rapperswil e da Turitg.

Era sin champ militar èsi i vinavant. Simeon è vegnì partì en la cumpagnia da stab dal battagliaiun da salvament en il Grischun, nua ch'el ha cuntanschi en il decurs dals onns il grad da maior. La

cumpagnia aveva spezialists da sanità, mecanists, funchers, manischnunz ed equipments cun maschinas da construcziun. «Cun quai san ins far insatge», di Simeon. Las truppas han bajegia punts, vias, biotops e realisà pitschens projects en l'entir Grischun. Ina giada hajan els schizunt tratg in vegl bumper american ord ina palì en il Partenz – l'eroplan era crudà giu la fin da la Segunda guerra mundiala.

## Trais dimensiuns

En ils onns novanta ha Simeon gù il giasch da lavurar en ils Stadis Unids. Quai è stà in dals motifs principals per midar tar il concern Sulzer che furniva da lez

temp maschinas da taiser en tut il mund, ma che produciva era locomotivas u turbinas. Igl era il temp ch'ils concerns da maschinas introducivan ils sistems da dissegnar en trais dimensiuns al computer. Simeon ha surpiglià la gruppa che ha sviluppà tals sistems per diversas partiziuns da Sulzer. Pli tard ha el timunà in grond project d'informatica d'introducì PLM – in sistem per accelerar process da svilup – en l'entir concern.

Plinavant ha Simeon profità d'in program intern da promoziun da cader, nua ch'el ha emprendì d'enconuscher pli dattiers anc dapli spartas da Sulzer. Ils plans dad ir en l'America ha Simeon dentant stuì emblidar, pertge il concern è vegnì en

las stretgas ed ha stritgà plazzas e projects. Era quai saja stà ina experientscha impurtanta, manegia Simeon oz.

## Professer per svilup da products

Il 2003 è el turnà a la Scol'auta a Rapperswil, nua ch'el aveva era durant ses temp tar Sulzer adina instrui intginas lecziuns d'utilisaziun da computer per inschigners da maschinas. Simeon è daventà professer per il svilup da products ed ha manà l'institut per design da products e construcziun. Radund 20 inschigners lavuran e perscruteschan oz en quest institut.

Simeon è losch da pudair dir che ses institut finanzieschia quasi sasez cun las numerusas incumbensas da perscrutaziun ord l'economia. Sin ina tura atras la scola mussa il professer intgins exempels d'objects che l'institut ha inventà: ina box per cumprimer butteglas da pet, ina pegli-filiens, in umbrival che glischa, in nov sistem per fermar pels vi da skis da tura, ina cuppa per tegnair frestg caviar, in sistem da transportar laina ord il gaud senza duvrar ni vias ni helicopters.

Dapi l'emprim da settember n'è Simeon dentant betg pli il manader da quest institut. Sco prorectur ha el da sa fatschen-tar cun tuts 17 instituts da la Scol'auta tecnica a Rapperswil, nua che var 1500 students studegian per daventar inschigners u inschigneras.

## Curt e bun

*Naschi ils:* 9 da fanadur 1960  
*Creschi si a:* Lantsch  
*Abitescha a:* Jona (SG)  
*Stadi civil:* maridà  
*Bab da:* trais figls  
*Sport:* viandar, ir cun skis  
*Instrument:* posauna